

հայեր, մեծ մասամբ ուսուցապատակներ, որոնք ինքնակամ կերպով գրաւում են թիւրք բնակիչներին տները՝ դուրս քշելով տեղական բնակիչ թիւրքերին: Հայերին բնակեցնում են Հասան-Ղալայի շրջանում առանց շրջանային կոմիտարիատի գիտութեան՝ արդելք լինելով Օղնուտ—Երզնկայի շրջանից տեղահանող ժողովրդի գաղթեցման ծրագրին: Խնդրում եմ շուտով կարգադրել՝ դադարեցնել հայկական մասնաւոր ընկերութիւնների կազմակերպած այդ գաղթը՝ տալով ինձ այդ մասին ղեկավարող ցուցմունքներ»:

Խնդիրը ինքնին պարզ էր. արեւմտահայ կազմակերպութիւնները, թիւրքահայաստանի ընդհանուր կոմիտարութեան գիտութեամբ ու հաւանութեամբ և զինւորական ու քաղաքացիական իշխանութիւնների աջակցութեամբ կատարում էին գաղթականների տեղաւորում, որի ժամանակ, հնարաւոր է, որ բռնութիւններ էլ կատարւած լինեն Բասէնի շրջանում: Բայց պէտք էր տեսնել, թէ ի՞նչ աղմուկ բարձրացրին մահմետական շրջանները, ի՞նչ ծանր մեղադրանքներ ուղղեցին հայերի հասցէին:

Մայիս 23-ին Թիֆլիսի Բանւ. և Զինւ. Խորհուրդը Գանձակից ստացաւ հետեւեալ հեռագիրը. «Գանձակ քաղաքում մահմետականներն ու հայերը բաժանւել են երկու մասի. մէջտեղը կանգնած է զօրքը. Արջևանիձէ»: Բնականաբար հասարակութեան ու կառավարական շրջաններում առաջ եկաւ սաստիկ իրարանցում: Անմիջապէս հեռախօսով հարցում արեց Գանձակ, և քաղաքապետ Սասմամեղովը զարմանքով պատասխանեց, թէ քաղաքում ոչինչ չի պատահել, հայերն ու թիւրքերը ապրում են հաշտ, և զօրքը մնում է իր տեղը: Ո՞ւմ էր հարկաւոր այդ չարամիտ խաղը. — մնաց չպարզւած:

Անհանդարտ, ջղադրգիւ վիճակ էր տիրում ամէն տեղ. մութ ձեռքը գործում էր անարդել և ոչ մի ճիգ, կառավարական կամ հասարակական ո՛չ մի ոյժ չկարողացաւ զսպել կամ առաջն առնել մահմետական շարժումների: Նրանք հետզհետէ ծաւալեցին, ստացան յարատե բնոյթ և 1917թ. վերջերին արդէն դարձել էին կովկասեան կեանքի ամենաաղէտաւոր երեւոյթը: Մահմետական հոծ զանգւածներ ունեցող շրջաններում, յաճախ, կտրւում էր երկաթուղային հաղորդակցութիւնը, և պէտք էր լինում գիմել արտակարգ միջոցներ՝ զինւորական ուժի ու զբահասպանների օգնութեան, որպէսզի բացւի ճանապարհը: Քրդական շարժումները նոր թափով բռնկւեցին 1918թ. յունւարի կէսերին, երբ ճակատի զանազան մասերում ուղղակի ճակատամարտներ մղւեցին քիւրդ հրոսախմբերի և կանոնաւոր զօրքերի միջև: Միայն յունւ. 15—16-ին, և միայն Երզնկայի շրջանում, պաշտօնական հաղորդագրութեամբ, քիւրդերի ձեռքով սպանւեց շուրջ 200 մարդ:

Այս ամենը, ի հարկէ, անգնահատելի ծառայութիւն էր թիւրքերին: Երբ կովկասն արդէն բաւական խառնւել էր ներքին խնդիրներով, իսկ, միւս կողմից, թիւրք բանակն արդէն վերստացած էր նախկին ռազմունակութիւնը, թիւրք հրամանատարութիւնը գիմեց վճռական քայլերի. դեկտ. 16-ին կովկասեան բանակի հրամանատարը Վեհիբ փաշայից ստացաւ մի նամակ, որի մէջ ասւում էր, թէ սպարապետ Էնվէր փաշան նկատել է, որ գրաււած վայրերում բռնութիւններ են գործադրւում թիւրքահայաստակների վերաբերմամբ և պահանջում է վերջ տալ դրանց: Մի քանի օր յետոյ, յունւ. 23-ին,